

DE HESIODI FRAGMENTO 251a M.-W.

Inter Hesiodea fragmenta usque adhuc in papyris reperta nullum — quod quidem sciam — ad poemation illud quod *Magnae Eoeae* vulgo inscribitur rettulerunt editores; itaque maxima perpendendum cura videtur fragmentum Papyro Oxy. 2498 servatum, quod editor E. Lobel («Oxyrh. Pap.», XXVIII, 1962, 70-71) nec non viri docti R. Merkelbach et M. West (*Fragmenta Hesiodea*, Oxonii 1967, n. 251a) *Magnis Eoeis* tribuerunt. Res tamen neque certa neque probabilis; nam Pausaniae testimonium ad partes ab editoribus advocatum aperte cum fragmenti textu pugnare videtur. Dicit enim Pausanias (IV, 2, 1 = fr. 251b M.-W.): πυθέσθαι δὲ σπουδῇ πάνυ ἐθελήσας οἵτινες παῖδες Πολυκάνων ἐγένοντο ἐκ Μεσσήνης, ἐπελεξάμην τάς τε Ἡοίας καλουμένας καὶ τὰ ἔπη τὰ Ναυπάκτια, πρὸς δὲ αὐτοῖς ὅπόσα Κιναΐθων καὶ "Ἄσιος ἐγενεαλόγησαν. οὐ μὴν ἔς γε ταῦτα ἦν σφισιν οὐδὲν πεποιημένον, ἀλλὰ "Υλλου μὲν τοῦ Ἡρακλέους θυγατρὶ Εὐαίχμῃ, συνοικῆσαι Πολυκάνωνα υἱὸν Βούτου λεγούσας τάς Μεγάλας οἰδα Ἡοίας· τὰ δὲ ἔς τὸν Μεσσήνης ἀνδρα καὶ τὰ ἔς αὐτὴν Μεσσήνην παρεῖται σφισι, nempe, ut perspicue intellexit F. Leo (*Hesiodea*, in «Ausgewählte kleine Schriften», Roma 1960, II, 351): «quos liberos Polycaon ex Messena habuerit, in Eoeis, Naupactiis, Cinaethonis et Asii genealogiis non narratur, sed in Magnis Eoeis narratur quem filium ex Euaechma habuerit, de Messena omnino nihil»; in fragmento autem restituendo, ex Pap. Oxy. 2498 haec certa elicere possumus: ἤτοι Πουλυκάνων .. - .. - .. - .. | ἡγάγεθ' ἵπποισιν .. - .. - .. - .. | | τὴν δὲ Πολυκρείων .. - .. - .. - .. | Εὐαίχμην, ἦ εἴδει ... Itaque, ut e versibus istis plane apparent, non Polycaon' (vel Polycooon), sed Polycreon puellam Euaechmam uxorem duxit. Neque Pausanias heroum nomina confundere potuit, tam aperte ipse fatetur Εὐαίχμη συνοικῆσαι Πολυκάνων υἱὸν Βούτου λεγούσας τάς Μεγάλας οἰδα Ἡοίας. Potuit contra fabularum antiquarum diligens investigator, qui *Magnas Eoeas* et assidue perlegit et in opere saepius suo laudavit, locum ibi invenisse, quo vices extarent Hylli filiarum et Butae regis filiorum: quem locum adhibere Pausanias satis habuit, cum fabulam investigaret de Polycaonis et Messenae liberis. Versus contra in papyro adservatos ad Hesiodeum *Catalogum* referre licet; nam in quarto poematis libro prope Alcmenae *Eoeam* procul dubio vices Hylli, Herculis filii, eiusque filiarum Aristaechmae et Euaechmae enarrabantur.